



Fasnacht 2014

"Yes we Scan" das isch dr Hit, mir alli loose mit!

dr Häuptling vo de n Amis, dr Barack Obama
findet s'Abloose vo dr Menschheit gar kai Drama
är muess doch wisse, was uff dr Wält duet laufe
und ob ebbe aine sy Biografie will kaufe

"Yes we can" isch sy Waalspruch gsi
was är het welle könne, lychtet nimmen yy
d'Merkel waiss, sii ka em nimm traue, s'isch verruggt
noodem sii erfaart, dass dr Obama iiri Daate muggt

dr Obama hoggt jetzt by Daag und Nacht
am PC im Wysse Huus, lacht und lacht
är liist grad alli Mails vom Christoph Mörgeli
und dänggt, jee het dää grossi Sörgeli

bekunnsch e SMS vom Schätzli uff dy ney Noika
macht die Noochricht gschwind d'Rundi by dr NSA
griegsch meegligewyys e Delifon vom Obama wo gratuliert
är het gheert, s'heb sich bym Schätzli e Baby infiltriert

dr Edward Snowden, e n Informant
muess sich verstege, säll isch bekannt
und jetzt, das isch fir e Barack bitter
leert dr Snowden russisch und zwischert wyter

jeedes Wort wird vo dr NSA kontrolliert
jeedes Mail uff Terrorwaarnige verifiziert
und macht nur ai Iraner in dr Wiesti e luute Furz
bedyvtet das fir sy Regierig dr näggsti Sturz

d'Freyheitsstatue heert alles ganz gnau
luuter Instinggt, s'isch schliesslig e Frau
sii isch wie jeedes wyyblig Wääse
e riisegrosse griene Rätschibääse

also gib acht druff, was im Internet dryybsch
und was mit wäm genau de schryybsch
vor allem sotsch nid geege d'Ami protestiere
usser du mechtisch s'Daagesmenu im Knast degustiere.

drum isch's jo kai llberraschig mee
dass sie könne in unseri Ghaimnis see

au mir als wissensdurstigi Sprysse

wänn nadierlig all eyri Ghaimnis wisse

mir faare gryz und quer dur d'Fasnacht
vo Morge bezyte bis spoot in d'Nacht
alles was mir seen wird doggmäntiert
und unsererne Frind in d'USA raportiert

kaufsch im Mediamarkt oder by Amazon

s'neyst und modärnst Deelifoos

muesch wisse, und doo liegi nid

das bekeeme mir alles mit

ob Gebuurtdaags- oder Wienachtsgschängg
kaufsch's im Internet, das loont sich dängg
s'Ypagge vom Gschängg, das kasch dir spaare
was du verschänggsch, hämmer scho lang erfaare

mir hagen uns in jeedi Internetromance
kaine goot is ab, kaine het e Chance

mir wache Daag und Nacht uff alli eyri Schritt

und notiere, was iir mache dien, flyssig mit.

veraint hämmer uns jetzt mit dr NSA

zien stolz unsere schwarze Aazug aa

mir spitze d'Oore und wänn loose

was bassiert uff de Basler Stroosse